

ծովը: Կերևայարկի սենեակներից մեկը ձեւացնում է մի փոքրիկ մատուռ, քարեղէն սեղանով: Այստեղ էր բնակւում Նարեկացին, այստեղ էր գրում իր սքանչելի գիրքը: Այստեղից տեսաւ Նա ս. Աստուածամօրը, աստուածորդի մանուկը գրկում, որի տեսութեանը այնքան մեծ տենչանքով փափագում էր Նա: Փոքրիկ Առ-տեր կղզու վրայ կանգնած էր Նրա տենչալին, եւ ամբողջ ծովը վառւում էր հրեղէն ճառագայթներով: Իր քարայրից ցած իջաւ Նարեկացին, մօտեցաւ ծովեզրին եւ, որպէս ցամաքի վրայ, Նա ջրի վրայով ընթանալով, ոտքով անցաւ ծովը եւ հասաւ կղզուն: Աստուածամայրը տոեց երանելի սուրբի գիրքը աստուածորդի մանուկին, ասելով. «առ տերե, այսինքն՝ առ քո տիրոջը: Եւ այն օրից այդ փոքրիկ կղզին կոչուեցաւ Առ – Տեր:

Հին Ռշտունիքը այժմ երկու գաւառների է բաժանուած՝ Գաւառ եւ Կարճկան, երկուսն էլ կոչւում են իրանց համանուն աւանների անունով, որոնց մէջ գաւառապետներ են Նստած: Սկսեալ Հայոց-ձորից, որը Գաւառի հիւսիս-արեւելեան սահմանն է, յիշեալ երկու գաւառները՝ Վանայ ծովակի հարաւային եզերքով՝ տարածւում են մինչեւ Մոզաց եւ Բզնունեաց աշխարհները: Ճանապարհը Նոյնպէս ոլորւում է ծովակի եզերքով, երբեմն բլուրովին մօտենում է, երբեմն փոքր-ինչ հեռանում է, բայց երբեք ծովեզերքից չէ բաժանւում: Նա այնքան Նեղ է, այնքան դժուարին ելելեջներ ունի եւ այնքան սարսափելի են Նրա անցքերը, որ իզուր չստացաւ իր Կապան անունը: Հայոց երկրի բազմաթիւ կապանների թւում Ռշտունեաց կապանը դժուարանցանելիներից մեկը պետք է համարել: Ամէն մի քայլում բաւական են մի քանի հրացանաւորներ, որ փակեն մի ամբողջ քարաւանի անցքը եւ, վանդակի մէջ բռնուած թռչունի նման, չթողնեն, որ տեղից շարժի: Ճանապարհը պտտւում է Նեղ ձորերի միջով, որոնց երկու կողմերից եւս բարձրանում են անհնարին ապառաժներ: Եւ այդ սատանայական լաբիրինթոսը քարաւանի միակ ուղին է, որ տանում է դէպի Բաղէշ եւ Մուշ: Մարդ խեղդւում է անձկութեան մէջ: Իսկ երբ դուրս ենք գալիս Նեղ կիրճերից եւ Մուշի ընդարձակ դաշտին ենք հասնում, այն ժամանակ միայն հորիզոնը բացւում է մեր առջեւ, սկսում ենք ազատ շունչ առնել:

Ռշտունիք, այդ ռաշիդների (քաջերի) աշխարհը, սնուցել է իր խիստ եւ վայրենի բնութեան համեմատ՝ մի ինքնուրոյն ժողովուրդ: Նրա բնակիչները՝ իր մթին անտառների եւ ահարկու լեռների նման՝ կոշտ, կոպիտ եւ անխորտակելի են: Հսկայ բնութիւնը ծնել է եւ հսկայ ժողովուրդ: Այստեղ միայն կարելի է տեսնել սահմանակից Հայոց-ձորի վաղեմի տիտանների վիթխարի սերունդը, որ իր քաջութեամբ բնաւ ետ չի մնում դրացի սասունցիներից: Չէ կարելի տեսնել եւ չիմանալ այդ առողջ, կենդանի, մշտագործ ժողովրդով: